



KEMENTERIAN PEMBANGUNAN WANITA,
KELUARGA DAN MASYARAKAT
JABATAN KEBAJIKAN MASYARAKAT

SIARAN MEDIA

PROGRAM RYTHM PERKASA KOMUNITI PRIHATIN TERHADAP WARGA EMAS DAN OKU

KLANG, 16 Ogos 2026 – Jabatan Kebajikan Masyarakat (JKM) terus memperkukuh kesedaran masyarakat terhadap kepentingan penjagaan warga emas dan Orang Kurang Upaya (OKU) menerusi penganjuran **Seminar Asas Penjagaan Warga Emas dan Orang Kurang Upaya (OKU) Bagi Zon Tengah** sempena Program **RYTHM – Ritma Kehidupan Harmoni** yang berlangsung di Hotel KSL Esplanade, Klang hari ini.

Program yang dirasmikan oleh YBhg. Datuk Che Murad Sayang bin Ramjan, Ketua Pengarah Kebajikan Masyarakat ini memberi fokus kepada peningkatan pengetahuan, kemahiran asas serta kesedaran masyarakat dalam aspek penjagaan holistik, kesejahteraan emosi dan sokongan komuniti terhadap warga emas dan OKU.

Penganjuran seminar ini amat signifikan selaras dengan peningkatan populasi warga emas dan keperluan sokongan berterusan kepada golongan OKU di negara ini. Ia juga menjadi platform penting dalam memperkukuh kefahaman masyarakat bahawa penjagaan golongan rentan bukan sekadar tanggungjawab keluarga, malah memerlukan penglibatan komuniti secara bersama.

Seminar ini menghimpunkan seramai kira-kira 500 peserta terdiri daripada penjaga warga emas dan OKU, penyelia dan ahli Pusat Aktiviti Warga Emas (PAWE), petugas Pusat Pemulihan Dalam Komuniti (PDK), sukarelawan, belia, pelajar Institut Pengajian Tinggi (IPT), pertubuhan bukan kerajaan (NGO), pegawai JKM serta masyarakat setempat yang terlibat dalam penjagaan/pengurusan warga emas dan OKU.

Antara pengisian utama program termasuk perkongsian ilmu berkaitan asas penjagaan warga emas dan OKU, pengurusan tekanan emosi penjaga, aspek keselamatan dan penjagaan harian serta pengukuhan sistem sokongan komuniti dalam membentuk masyarakat yang lebih prihatin dan penyayang.

Program RYTHM – Ritma Kehidupan Harmoni merupakan inisiatif strategik KPWKM melalui JKM bersama Kementerian Belia dan Sukan serta Kementerian Pengajian Tinggi dalam memperkasa penglibatan komuniti, sukarelawan dan generasi muda dalam usaha memperkukuh sistem sokongan sosial negara serta meningkatkan kesejahteraan kumpulan sasar secara menyeluruh.

Penganjuran program seperti ini selaras dengan aspirasi Malaysia MADANI yang menekankan nilai ihsan, kesejahteraan, keharmonian masyarakat dan semangat kebersamaan dalam membina komuniti yang lebih sejahtera dan berdaya tahan.

##TAMAT##

**Dikeluarkan Oleh:
JABATAN KEBAJIKAN MASYARAKAT
16 OGOS 2026**